

慧日佛學班第 08 期

## 《大智度論》卷 51

〈釋勝出品第二十二〉  
(大正 25, 422a19-424b17)

釋厚觀 (2010.04.03)

### 【經】

壹、就「三解脫門」說般若 (承上卷 42~卷 44)

貳、就「菩薩、摩訶薩」說般若 (承上卷 44~卷 46)

參、就「摩訶衍義」說般若<sup>1</sup> (承上卷 44~卷 52)

(壹) 須菩提問摩訶衍等五義 (承上卷 46)

(貳) 佛答摩訶衍等五義 (承上卷 46~卷 50)

(參) 須菩提以勝出等五義稱歎摩訶衍

#### 一、勝出歎

慧命須菩提白佛言：「世尊！摩訶衍<sup>2</sup>、摩訶衍者，勝出<sup>3</sup>一切世間及諸天、人、阿修羅。

#### 二、等空歎

世尊！是摩訶衍與<sup>4</sup>虛空等。

#### 三、含受歎

如虛空受無量無邊阿僧祇眾生，摩訶衍亦如是受無量無邊阿僧祇眾生。<sup>5</sup>

<sup>1</sup> (1) 《大智度論疏》卷 17：「第九品者名為〈集散品〉，即是命說分中第三大分，從此下去，始明善吉承命正說波若。就正說文中，大有四分：初，從此品、〈10 相行品〉、〈11 約<sup>\*</sup>品〉，此之三品，然三解然<sup>\*</sup>門明說波若。第二，從〈12 句義品〉已下，去至〈17 縛解品〉，是就人大就於波若——已知大法故名為大人。第三，從〈18 摩訶衍品〉已下，去訖至〈24 會宗品〉，有七品經文，次就於法大已說波若——以為大人所知故名大法。第四，從〈25 十無品〉及〈26 無生品〉，生此之二品，初明除生，後明遣法，故約遣相門以明波若。」(卍新續藏 46, 864a1-9)

※案：「約品」應作「幻品」。

※案：「三解然門」應作「三解脫門」。

(2) 《摩訶般若波羅蜜經》〈9 集散品〉至〈26 無生品〉約可分四大部分：壹、就三解脫門說般若 (〈9 集散品〉、〈10 行相品〉、〈11 幻人無作品〉，見《大智度論》卷 42~卷 44)，貳、就「菩薩、摩訶薩」說般若 (〈12 句義品〉、〈13 摩訶薩品〉、〈14 斷見品〉、〈15 大莊嚴品〉、〈16 乘乘品〉、〈17 無縛無脫品〉，見《大智度論》卷 44~卷 46)，參、就摩訶衍義說般若 (〈18 摩訶衍品〉、〈19 四念處品〉、〈20 發趣品〉、〈21 出到品〉、〈22 勝出品〉、〈23 含受品〉、〈24 會宗品〉，見《大智度論》卷 46~卷 52)，肆、以遣相門 (無生門) 說般若 (〈25 十無品〉及〈26 無生品〉，見《大智度論》卷 52~卷 53)。

<sup>2</sup> 摩訶衍=摩訶術【聖】下同。(大正 25, 422d, n.10)

<sup>3</sup> 勝出=出勝【石】下同。(大正 25, 422d, n.11)

<sup>4</sup> 〔與〕—【宋】【元】【明】【宮】【聖】。(大正 25, 422d, n.12)

<sup>5</sup> 《大般若波羅蜜多經》卷 417 〈20 超勝品〉：「世尊！如是大乘與虛空等，猶如虛空普能容受無量無數無邊有情；大乘亦爾，普能容受無量無數無邊有情。世尊！由此緣故，菩薩摩訶薩大乘即是一切智智乘。」(大正 7, 94a5-8)

**四、不見來去住處歎**

世尊！是摩訶衍不見來處，不見去處，不見住處。<sup>6</sup>

**五、三世等歎**

是摩訶衍前際不可得、後際不可得、中際不可得，三世等是摩訶衍。

世尊！以（422b）是故，是乘名摩訶衍。」

**（肆）佛述成，並廣述勝出等五歎****一、略說摩訶衍相**

佛告須菩提：「如是！如是！菩薩<sup>7</sup>摩訶薩摩訶衍，所謂六波羅蜜：檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜，是名菩薩摩訶薩摩訶衍。

復次，須菩提！菩薩摩訶薩摩訶衍，所謂<sup>8</sup>一切陀羅尼門、一切三昧門，所謂首楞嚴三昧乃至離著虛空不染三昧，是名菩薩摩訶薩摩訶衍。

復次，須菩提！菩薩摩訶薩摩訶衍，所謂內空乃至無法有法空，是名菩薩摩訶薩摩訶衍。

復次，須菩提！菩薩摩訶薩摩訶衍，所謂四念處乃至十八不共法，是名菩薩摩訶薩摩訶衍。

**二、廣述勝出等五歎****（一）勝出歎****1、總相說摩訶衍勝出**

如須菩提所言：『是摩訶衍勝出一切世間及諸天、人、阿修羅。』<sup>9</sup>

**（1）有為法非實故****A、三界非實故**

須菩提！若欲界當有實、不虛妄、不異、諦、不顛倒、有常、不壞相、非無法者，是摩訶衍不能勝出一切世間及諸天、人、阿修羅；須菩提！以欲界虛妄憶想分別、和合名字等有、一切無常相、無法，以是故，摩訶衍勝出一切世間及諸天、人、阿修羅。<sup>10</sup>

<sup>6</sup> 《大般若波羅蜜多經》卷 417〈20 超勝品〉：「世尊！又如虛空無來無去無住可見；大乘亦爾，無來無去無住可見，無動無住故名大乘。」（大正 7，94a8-10）

<sup>7</sup> （是）+菩薩【宋】【元】【明】【宮】。（大正 25，422d，n.13）

<sup>8</sup> 〔所謂〕—【宋】【元】【明】【宮】【聖】。（大正 25，422d，n.14）

<sup>9</sup> 《大般若波羅蜜多經》卷 417〈20 超勝品〉：「復次，善現！汝說『大乘超勝一切世間天、人、阿素洛等，最尊最勝、最上最妙』者，如是！如是！如汝所說。善現！此中何等說名一切世間天、人、阿素洛等？所謂欲界、色無色界。」（大正 7，94a23-26）

<sup>10</sup> 《大般若波羅蜜多經》卷 417〈20 超勝品〉：「善現！若欲界是真如，非虛妄、無變異、不顛倒、是實、是諦，如所有性、一切常恆、無變無易、有實性者，則此大乘非尊非勝、非上非妙，不能超勝一切世間天、人、阿素洛等。善現！以欲界是所計是假合有遷動，乃至一切無常無恆、有變有易、都無實性故，此大乘是尊是勝、是上是妙，超勝一切世間天、人、阿素洛等。」（大正 7，94a26-b4）

須菩提！色界、無色界若當實有、不虛妄、不異、諦、不顛倒、有常、不壞相、非無法者，是摩訶衍不能勝出一切世間及諸天、人、阿修羅；須菩提！以色界、無色界虛妄憶想分別、和合名字等有、一切無常、破壞相、無法，以是故，摩訶衍勝出一切世間及諸天、人、阿修羅。

#### **B、五蘊、六根、六塵、六識、六觸、六受非實故**

須菩提！若色當實有、不虛妄、不異、諦、不顛倒、有常、不壞相、非無法者，是摩訶衍不能勝出一切世間及諸天、人、阿修羅。須菩提！以色虛妄憶想分別、和合名字等有、一切無常、破壞相、無法，以是故，是摩訶衍勝出一切世間及諸天、人、阿修羅。

受、想、行、識（422c）亦如是。

須菩提！若眼乃至意、色乃至法、眼識乃至意識、眼觸乃至意觸、眼觸因緣生受乃至意觸因緣生受，若當實有、不虛妄、不異、諦、不顛倒、有常、不壞相、非無法者，是摩訶衍不能勝出一切世間及諸天、人、阿修羅。須菩提！以眼<sup>11</sup>乃至意觸因緣生受，虛妄憶想分別、和合名字等有、一切無常、破壞相、無法，以是故，摩訶衍勝出一切世間及諸天、人、阿修羅。

#### **(2) 法性等無為法非實故**

須菩提！若法性是有法、非無法者，是摩訶衍不能勝出<sup>12</sup>一切世間及諸天、人、阿修羅；須菩提！以法性無法、非法，以是故，摩訶衍勝出一切世間及諸天、人、阿修羅。<sup>13</sup>

須菩提！若如、實際、不可思議性是有法、非無法者，是摩訶衍不能勝出一切世間及諸天、人、阿修羅；須菩提！以<sup>14</sup>如、實際、不可思議性無法、非法；以是故，摩訶衍勝出一切世間及諸天、人、阿修羅。

#### **(3) 六度等法非實故**

##### **A、六度非實故**

須菩提！若檀波羅蜜是有法、非無法者，是摩訶衍不能勝出一切世間及諸天、人、阿修羅；以檀波羅蜜無法<sup>15</sup>、非法，以是故，摩訶衍勝出一切世間及諸天、人、阿修羅。

若尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜是有法、非無法者，是摩訶衍不能勝出一切世間及諸天、人、阿修羅；以尸羅波羅蜜乃至般若波羅蜜無法、非法，以是故，摩訶衍勝出一切世間及諸天、人、阿修羅。

<sup>11</sup> 眼+（觸）【石】。（大正 25，422d，n.15）

<sup>12</sup> 勝出=出勝【聖】【石】。（大正 25，422d，n.16）

<sup>13</sup> 《大般若波羅蜜多經》卷 417〈20 超勝品〉：「復次，善現！若法界是實有、非非有者，則此大乘非尊非勝、非上非妙，不能超勝一切世間天、人、阿素洛等。善現！以法界非實有，是非有性故，此大乘是尊是勝、是上是妙，超勝一切世間天、人、阿素洛等。」（大正 7，95c13-17）

<sup>14</sup> （是）+以【聖】。（大正 25，422d，n.17）

<sup>15</sup> 無法非法=非法無法【宋】【宮】【聖】。（大正 25，422d，n.18）

**B、十八空非實故**

須菩提！若內空乃至無法有法空是有法、非無法者，是摩訶衍不能勝出一切世間及諸天、人、阿修羅；以內空乃至無法有法空無法、非法，以是故，摩訶衍勝出一切世間及諸天、人、阿修羅。<sup>16</sup>

**C、三十七道品乃至十八不共法非實故**

須菩提！若四念處乃至十八不共法是有法、非無法者，是摩訶衍不能勝出一切世間及諸天、人、阿修羅；以四念處乃至十八不共法無法、非法，以是故，摩訶衍勝出一切世間及諸天、人、阿修羅。

**D、性人法乃至佛法非實故**

須菩（423a）提！若性人法<sup>17</sup>是有法、非無法者，是摩訶衍不能勝出一切世間及諸天、人、阿修羅；以性人法無法、非法，以是故，摩訶衍勝出一切世間及諸天、人、阿修羅。

須菩提！若八人法、須<sup>18</sup>陀洹法、斯陀含法、阿那含法、阿羅漢法、辟支佛法、佛法是有法、非無法者，是摩訶衍不能勝出一切世間及諸天、人、阿修羅；以八人法乃至佛法無法、非法，以是故，摩訶衍勝出一切世間及諸天、人、阿修羅。<sup>19</sup>

**E、性人乃至佛非實故**

須菩提！若性人是有法、非無法者，是摩訶衍不能勝出一切世間及諸天、人、阿修羅；以性人無法、非法；以是故，摩訶衍勝出一切世間及諸天、人、阿修羅。

<sup>16</sup> 《大般若波羅蜜多經》卷 417〈20 超勝品〉：「復次，善現！若內空是實有，非非有者，則此大乘非尊非勝、非上非妙，不能超勝一切世間天、人、阿素洛等。善現！以內空非實有，是非有性故，此大乘是尊是勝、是上是妙，超勝一切世間天、人、阿素洛等。善現！若外空、內外空、空空、大空、勝義空、有為空、無為空、畢竟空、無際空、散無散空、本性空、自共相空、一切法空、不可得空、無性空、自性空、無性自性空是實有，非非有者，則此大乘非尊非勝、非上非妙，不能超勝一切世間天、人、阿素洛等。善現！以外空乃至無性自性空非實有，是非有性故，此大乘是尊是勝、是上是妙，超勝一切世間天、人、阿素洛等。」（大正 7，96a4-16）

<sup>17</sup> 《舍利弗阿毘曇論》卷 8：「云何性人？若人次第住凡夫勝法，若法即滅，上正決定，是名性人。云何性人？若人成就性法。何等性法？若無常、苦、空、無我，思惟涅槃寂滅，不定心，未上正決定如實人，若受、想、思、觸、思惟、覺、觀、見、慧解脫、無癡，順信、悅、喜、心進、信、欲、不放逸、念、意識界、意界，若如實身戒、口戒，是名性法。若人此法成就，是名性人。」（大正 28，585a14-20）

<sup>18</sup> （若）+須【聖】【石】。（大正 25，423d，n.1）

<sup>19</sup> （1）《大般若波羅蜜多經》卷 418〈20 超勝品〉：「復次，善現！若種姓法是實有、非非有者，則此大乘非尊非勝、非上非妙，不能超勝一切世間天、人、阿素洛等。善現！以種姓法非實有，是非有性故，此大乘是尊是勝、是上是妙，超勝一切世間天、人、阿素洛等。善現！若第八法、預流法、一來法、不還法、阿羅漢法、獨覺法、菩薩法、如來法是實有、非非有者，則此大乘非尊非勝、非上非妙，不能超勝一切世間天、人、阿素洛等。善現！以第八法乃至如來法非實有，是非有性故，此大乘是尊是勝、是上是妙，超勝一切世間天、人、阿素洛等。」（大正 7，96b17-27）

（2）案：鳩摩羅什譯的《摩訶般若波羅蜜經》及《大智度論》未提及「菩薩法」。

須菩提！若八人、須陀洹乃至佛是有法、非無法者，是摩訶衍不能勝出一切世間及諸天、人、阿修羅；以八人乃至佛無法、非法，以是故，摩訶衍勝出一切世間及諸天、人、阿修羅。

**F、一切世間及諸天、人、阿修羅非實故**

須菩提！若一切世間及諸天、人、阿修羅是有法、非無法者，是<sup>20</sup>摩訶衍不能勝出一切世間及諸天、人、阿修羅；以一切世間及諸天、人、阿修羅無法、非法，以是故，摩訶衍勝出一切世間及諸天、人、阿修羅。

**G、菩薩初發心乃至坐道場間諸心非實故**

須菩提！若菩薩摩訶薩從初發心乃至道場，於其中間諸心，若當是<sup>21</sup>有法、非無法者，是摩訶衍不能勝出一切世間及諸天、人、阿修羅；以菩薩從初發心乃至道場諸心無法、非法，以是故，摩訶衍（423b）勝出一切世間及諸天、人、阿修羅。

**H、如金剛慧非實故**

須菩提！若菩薩摩訶薩如金剛慧是有法、非無法者，是菩薩摩訶薩不能知一切結使及習無法、非法，得一切種智；須菩提！以菩薩摩訶薩如金剛慧無法、非法，是故菩薩知一切結使及習無法、非法，得一切種智，以是故，摩訶衍勝出一切世間及諸天、人、阿修羅。<sup>22</sup>

**2、別相說**

**(1) 諸佛三十二相非實故**

須菩提！若諸佛三十二相是有法、非無法者，諸佛威德不能照然、勝出一切世間及諸天、人、阿修羅；須菩提！以諸佛三十二相無法、非法，以是故，諸佛威德照然，勝出一切世間及諸天、人、阿修羅。

**(2) 諸佛光明非實故**

須菩提！若諸佛光明是有法、非無法者，諸佛光明不能普照恒河沙等世界；須菩提！以諸佛光明無法、非法，以是故，諸佛能以光明普照恒河沙等世界。

**(3) 諸佛音聲非實故**

須菩提！若諸佛六十種莊嚴音聲是有法、非無法者，諸佛不能以六十種莊嚴音聲遍至十方無量阿僧祇世界；須菩提！以諸佛六十種莊嚴音聲無法、非法，以是故，諸佛能以六十種莊嚴音聲遍至十方無量阿僧祇世界。

**(4) 諸佛轉法輪度眾生非實故**

須菩提！諸佛法輪是有法、非無法者，諸佛不能轉法輪——諸沙門、婆羅門、

<sup>20</sup> 是=者【聖】。(大正 25, 423d, n.2)

<sup>21</sup> 〔是〕—【宋】【元】【明】【宮】【聖】【石】。(大正 25, 423d, n.2)

<sup>22</sup> 《大般若波羅蜜多經》卷 418〈20 超勝品〉：「復次，善現！若菩薩摩訶薩金剛喻智是實有、非非有者，則菩薩摩訶薩不應用此金剛喻智達一切法自性皆空，永斷一切煩惱習氣相續，證得一切智智，亦不能超勝一切世間天、人、阿素洛等。善現！以菩薩摩訶薩金剛喻智非實有，是非有性故，諸菩薩摩訶薩用此金剛喻智達一切法自性皆空，永斷一切煩惱習氣相續，證得一切智智，亦能超勝一切世間天、人、阿素洛等。」(大正 7, 96c28-97a7)

若天、若魔、若梵及世間餘眾所不能如法轉者；<sup>23</sup>須菩提！以諸佛法輪無法、非法，以是故，諸佛轉法輪——諸沙門、婆羅門、若天、若魔、若梵及世間餘眾所不能如法轉者。

須菩提！諸佛為眾生轉法輪，是眾生若實有法、非無法者，不能令是眾生於無餘涅槃而般涅槃；須菩提！以諸佛為眾生轉法輪，是眾生無法、非法，以是故，眾生<sup>24</sup>於無餘涅槃中已滅、今滅、(423c) 當滅。」<sup>25</sup>

【論】者<sup>26</sup>言：

(參) 須菩提以勝出等五義稱歎摩訶衍

一、勝出歎

(一) 標宗：摩訶衍勝出一切世間及諸天、人、阿修羅

須菩提上以五事<sup>27</sup>問摩訶衍，佛已答竟。

須菩提歡喜讚歎，作是言：「世尊！是摩訶衍有大力勢，破壞人、天世間已，能於中勝出。」

(二) 舉喻

譬如三人度惡道：一者、於夜逃遁<sup>28</sup>，獨脫其身；二者、以錢求免<sup>29</sup>；三者、如大王將大軍眾，摧破寇賊，舉軍全<sup>30</sup>濟<sup>31</sup>，無所畏難。

(三) 合法

三乘亦如是——

如阿羅漢不能知一切總相、別相，亦不能破魔王，又不能降伏外道；厭老、病、死，直趣涅槃。

如辟支佛入諸法實相，深於聲聞，少有悲心，以神通力化度眾生；能破煩惱，不能破魔人及外道。

<sup>23</sup> 《大般若波羅蜜多經》卷 418〈20 超勝品〉：「復次，善現！若諸如來、應、正等覺所轉法輪是實有、非非有者，則諸如來、應、正等覺所轉法輪非極清淨，亦非一切世間沙門、婆羅門等所不能轉，亦不能超勝一切世間天、人、阿素洛等。」(大正 7，97a29-b4)

<sup>24</sup> (能令) + 眾生【元】【明】。(大正 25，423d，n.11)

<sup>25</sup> 《大般若波羅蜜多經》卷 418〈20 超勝品〉：「復次，善現！若諸如來、應、正等覺所化有情是實有、非非有者，則諸如來、應、正等覺所轉法輪，不能令彼諸有情類於無餘依妙涅槃界而般涅槃，亦不能超勝一切世間天、人、阿素洛等。善現！以諸如來、應、正等覺所化有情非實有，是非有性故，諸如來、應、正等覺所轉法輪，皆能令彼諸有情類於無餘依妙涅槃界而般涅槃，亦能超勝一切世間天、人、阿素洛等。」(大正 7，97b8-16)

<sup>26</sup> (論) + 者【元】【明】【石】。(大正 25，423d，n.12)

<sup>27</sup> 《正觀》(6)，p.139：《大智度論》卷 46〈18 摩訶衍品〉：「爾時，須菩提白佛言：『世尊！<sup>(1)</sup>何等是菩薩摩訶薩摩訶衍？<sup>(2)</sup>云何當知菩薩摩訶薩發趣大乘？<sup>(3)</sup>是乘發何處？是乘至何處？<sup>(4)</sup>當住何處？<sup>(5)</sup>誰當乘是乘出者？』」(大正 25，393b2-5)

<sup>28</sup> 逃遁：逃走，逃避。(《漢語大詞典》(十)，p.799)

<sup>29</sup> 免=勉【石】。(大正 25，423d，n.13)

<sup>30</sup> 全=令【聖】。(大正 25，423d，n.14)

<sup>31</sup> (1) 濟：3.越過，度過。(《漢語大詞典》(六)，p.190)

(2) 全濟：保全，救活。(《漢語大詞典》(一)，p.1165)

如菩薩從初發心，於一切眾生起大慈悲，雖未得佛，於其中間利益無量眾生；決定知諸法實相、具足六波羅蜜故，破諸魔王及壞外道；斷煩惱習，具足一切種智，總相、別相，悉知悉了，成阿耨多羅三藐三菩提。

三人雖俱免生死，然方便道各異。<sup>32</sup>

#### 〔四〕結成

是故須菩提讚歎摩訶衍：摧破一切世間，勝出人、天、阿修羅上。

#### 二、等空歎，三、含受歎

譬如虛空含受一切國土，而虛空故不盡；  
摩訶衍亦如是，含受三世諸佛及諸弟子，摩訶衍亦不滿。

#### 四、不見來去住歎，五、三世等歎

又如虛空常相故，無入相、無出相、無住相；  
是乘亦如是，無未來世入處、無過去世出處、無現在世住處——破三時故，三世等名摩訶衍。

#### 〔肆〕佛述成，並廣述勝出等五歎

##### 一、略說摩訶衍相

##### 〔一〕釋佛更說摩訶衍相之因由

問曰：佛應讚須菩提所歎言「善哉」，何以更說摩訶衍？

答曰：佛將欲<sup>33</sup>順須菩提所歎而讚說，以上說摩訶衍遠故，<sup>34</sup>今略說摩訶衍相，然後廣述。

##### 〔二〕明六度乃至十八不共法等是摩訶衍

須菩提所讚摩訶衍者，所謂六波羅蜜、諸陀羅尼門、三（424a）昧門、十八空、四念處乃至十八不共法等。

##### 二、廣述勝出等五歎

##### 〔一〕勝出歎

##### 1、總相說摩訶衍勝出

如須菩提所說「摩訶衍，破壞一切世間，勝出人、天、阿修羅上」者，是事實爾。何以故？

##### 〔1〕有為法非實故

##### A、三界非實故

是三界虛誑，如幻如夢，無明虛妄，因緣故有，因果無有定實，一切無常、破壞、磨<sup>35</sup>滅，皆是空相。以摩訶衍與三界相違，故能摧破勝出。

若三界定實、常、不虛妄，是摩訶衍不能摧破勝出。何以故？力等故。

<sup>32</sup> 三乘：出離不同。（印順法師，《大智度論筆記》〔E008〕p.300）

<sup>33</sup> 將欲＝欲將【宋】【元】【明】【宮】【石】＝欲持【聖】。（大正 25，423d，n.16）

<sup>34</sup> 參見《摩訶般若波羅蜜經》卷 5〈18 問乘品（摩訶衍品）〉、〈19 廣乘品（四念處品）〉（大正 8，249c29-256b28），《大智度論》卷 46～卷 48（大正 25，393b1-409c15）。

<sup>35</sup> 磨＝摩【宋】【元】【明】【宮】。（大正 25，424d，n.1）

**B、五蘊、六根、六塵、六識、六觸、六受非實故**

五眾、十二入、十八界、六觸生諸受亦如是。

**(2) 法性等無為法非實故**

若法性是有法、非無法者，摩訶衍不能破世間得勝出；須菩提！以法性非有故，摩訶衍能得勝出世間。

**※ 因論生論：無為是實法，云何言無<sup>36</sup>**

問曰：有為法，因緣和合虛誑故言「無」；如、法性、實際、<sup>37</sup>不<sup>38</sup>思議性，是無為實法，名為「實際」，云何言「無」？

答曰：

**A、無為空故言無**（印順法師，《大智度論筆記》〔B015〕p.138）

無為空故言「無」。

**B、有為實相即無為；離有為，無為不可得故**（印順法師，《大智度論筆記》〔B015〕p.138）

復次，佛說：「離有為，無為法不可得；有為法實相即是無為法。」

**C、以人於法性起諍故言無**（印順法師，《大智度論筆記》〔B015〕p.138）

復次，觀是有為法虛誑。如「如、法性、實際」是實；以人於法性取相起諍故，言「無法性」。或說「有」、或說「無」，各有因緣，故無咎。如、實際、不可思議性亦如是。

**(3) 六度等法非實故<sup>39</sup>**

**A、世間檀著故有，出世檀無故空**（印順法師，《大智度論筆記》〔B015〕p.139）

世間檀波羅蜜著故有，出世間檀波羅蜜無故空；

**B、破慳貪言有，破邪見言無**（印順法師，《大智度論筆記》〔B015〕p.139）

為破慳貪故言「有檀波羅蜜」，破邪見故言「檀波羅蜜無」；

**C、為度初學說有，聖人心中言無**（印順法師，《大智度論筆記》〔B015〕p.139）

為度初學者說言「有」，若聖人心中說言「無」。<sup>40</sup>

**2、別相說**

**(1) 釋「諸佛為眾生轉法輪，度眾生等非實有」**

<sup>36</sup> (1) 無為：三義言無。(印順法師，《大智度論筆記》〔E005〕p.295)

(2) 一、無為空故言無。  
無為實法，如何言無—二、有為實相即無為；離有為法，無無為故。  
—三、人於法性起諍，故言無。

(印順法師，《大智度論筆記》〔B015〕p.138)

<sup>37</sup> 「如、法性、實際」，參見《大智度論》卷 32 (大正 25, 297b22-299a21)。

<sup>38</sup> 不+ (可)【元】【明】。(大正 25, 424d, n.2)

<sup>39</sup> 一、世間檀著故有，出世檀無故空。

六度等行，云何言無—二、破慳貪言有，破邪見言無。

—三、為度初學說有，聖人心中言無。

(印順法師，《大智度論筆記》〔B015〕p.139)

<sup>40</sup> 六度：說有、說無三義。(印順法師，《大智度論筆記》〔E008〕p.300)

如檀波羅蜜，乃至若眾生實有、非是無法，不應令強滅、入無餘涅槃。<sup>41</sup>

**(2) 明何以諸佛三十二相之後不說「摩訶衍勝出」**

問曰：從三十二相已後，何以不說言「摩訶衍勝出」？

答曰：

**A、文煩故不說**

應當說，直<sup>42</sup>文煩故不說。

**B、亦是摩訶衍，但名字異**

復次，三十二相乃至為眾生轉法輪亦是摩訶衍，但名字異耳。

**C、上總相說，今別相說云何勝出**

復次，上總相說摩訶衍勝出，不知云何勝出；今別相說，所謂——

**(A) 佛三十二相**

佛三十二相莊嚴身故，勝一切眾生；

**(B) 諸佛光明**

佛（424b）光明勝日、月、諸天一切光明；

**(C) 諸佛音聲**

佛音聲勝一切音樂、世界妙聲、諸天梵音；

**(D) 諸佛轉法輪度眾生**

佛法輪勝轉輪聖王寶<sup>43</sup>輪及諸外道一切法輪，無障無礙。餘法輪所利益微淺，或一世、二世，極至千萬世；佛法輪能令永入無餘涅槃，不復還入生死。

復次，若眾生實有者，佛不應令眾生入涅槃，永拔其根，此過於殺一身，有如是咎；以眾生顛倒心見我故，佛欲破其顛倒，說言涅槃，無眾生可滅，<sup>44</sup>故無咎。

有如是功德故，摩訶衍能勝出一切世間。

**3、釋獨說「勝出諸天、人、阿修羅」之理由**

問曰：「一切世間」者，十方六道眾生，何以獨說「勝出諸天、人、阿修羅」？

答曰：六道中，三是善道，三是惡道。摩訶衍尚能破三善道勝出，何況惡道！

**※ 因論生論：經說有龍得菩薩道，云何言龍是惡道**

問曰：《龍王經》中說龍得菩薩道，<sup>45</sup>何以說是惡道？

答曰：

<sup>41</sup> 案：依論文，本段文句可包含經中所說「六波羅蜜無法、非法」乃至「眾生於無餘涅槃中已滅、今滅、當滅」等內容，說明六度、十八空等非實有，及諸佛三十二相乃至佛轉法輪度眾生入涅槃等皆非實有。為方便計，此段文句列於「別相說」之下。

<sup>42</sup> 直：31.副詞。特，但，只不過。（《漢語大詞典》（一），p.853）

<sup>43</sup> 寶＝實【聖】。（大正 25，424d，n.4）

<sup>44</sup> 涅槃：實無眾生可滅。（印順法師，《大智度論筆記》〔E008〕p.300）

<sup>45</sup> （1）《佛說海龍王經》卷 2（大正 15，142c21-144a23）、卷 3（大正 15，149b21-150c5）。

（2）龍王經：龍得菩薩道。（印順法師，《大智度論筆記》〔H017〕p.409）

**(1) 得道少故**

眾生無量無邊，龍得道者少。

**(2) 得菩薩道者是菩薩變化身故**

復次，有人言：「大菩薩變化身教化故，作龍王身。」

〈釋<sup>46</sup>含受品<sup>47</sup>第二十三<sup>48</sup>〉  
(大正 25, 424b18-429b17)

**【經】**

**(二) 等空歎**

**1、佛印成，並廣述虛空及摩訶衍無種種相**

佛告須菩提：「汝所言：『衍與空等。』如是！如是！須菩提！摩訶衍與空等。

**(1) 無十方相**

須菩提！如虛空無東方，無南方西方北方、四維、上下；須菩提！摩訶衍亦如是，無東方，無南方西方北方、四維、上下。

**(2) 非形色相**

須菩提！如虛空非長非短、非方非圓；須菩提！摩訶衍亦如是，非長非短、非方非圓。

**(3) 非顯色相**

須菩提！如虛空非青、非黃、非赤、非白、非黑；摩訶衍亦如是，非青、非黃、非赤、非白、非黑。

以是故說摩訶衍與空等。

**(4) 非三世相**

須菩提！如虛空非過去、非未來、非現在；摩訶衍亦如是，非過去、非未來、非現在。

以是故說摩訶衍與空等。

**(5) 無增減垢淨生滅相**

須菩提！（424c）如<sup>49</sup>虛空不增不減；摩訶衍亦如是，不增不減。

須菩提！如虛空無垢無淨；摩訶衍亦如是，無垢無淨。

須菩提！如虛空無生、無滅、無住、無異；摩訶衍亦如是，無生、無滅、無住、無異。

<sup>46</sup> 大智度經論卷第五十三首【石】，〔大智度論〕－【明】【聖】。（大正 25, 424d, n.8）

<sup>47</sup> 含受品＝等空品【宮】，〔含受品〕－【聖】。（大正 25, 424d, n.9）

<sup>48</sup> 二十三＝二十三品。（大正 25, 424d, n.10）

<sup>49</sup> （亦）＋如【聖】。（大正 25, 424d, n.12）

**(6) 非三性相**

須菩提！如虛空非善非不善、非記非無記；摩訶衍亦如是，非善非不善、非記非無記。

以是故說摩訶衍與空等。

**(7) 無見聞覺知相**

如虛空無見、無聞、無知<sup>50</sup>、無識；摩訶衍亦如是，無見、無聞、無知、無識。

**(8) 非知斷證修相**

如虛空不可知、不可識、不可見、不可斷、不可證、不可修；摩訶衍亦如是，不可知、不可識<sup>51</sup>、不可見、不可斷、不可證、不可修。<sup>52</sup>

以是故說摩訶衍與空等。

**(9) 非染離相**

如虛空非染相、非離相；摩訶衍亦如是，非染相、非離相。<sup>53</sup>

**(10) 非界繫相**

如虛空不繫欲界、不繫色界、不繫無色界；摩訶衍亦如是，不繫欲界、不繫色界、不繫無色界。

**(11) 無菩薩十心相**

如虛空無初發心，亦無二、三、四、五、六、七、八、九、第十心；摩訶衍亦如是，無初發心，乃至無<sup>54</sup>第十心。

**(12) 無三乘共地相**

如虛空無乾慧地、姓<sup>55</sup>地<sup>56</sup>、八人地、見地、薄地、離欲地、已辦<sup>57</sup>地；摩訶衍亦如是，無乾慧地乃至<sup>58</sup>已作地。<sup>59</sup>

<sup>50</sup> 知=覺【聖】【石】。(大正 25, 424d, n.14)

<sup>51</sup> 識=證【聖】。(大正 25, 424d, n.16)

<sup>52</sup> 《大般若波羅蜜多經》卷 418〈21 無所有品〉：「善現！又如虛空非所知、非所達、非遍知、非永斷、非作證、非修習；大乘亦爾，非所知、非所達、非遍知、非永斷、非作證、非修習，故說大乘與虛空等。」(大正 7, 97c13-16)

<sup>53</sup> 《大般若波羅蜜多經》卷 418〈21 無所有品〉：「善現！又如虛空非有貪法非離貪法、非有瞋法非離瞋法、非有癡法非離癡法；大乘亦爾，非有貪法非離貪法、非有瞋法非離瞋法、非有癡法非離癡法，故說大乘與虛空等。」(大正 7, 97c19-22)

<sup>54</sup> 〔無〕—【宋】【元】【明】【宮】。(大正 25, 424d, n.17)

<sup>55</sup> 姓=性【宋】【元】【明】【宮】【聖】【石】。(大正 25, 424d, n.18)

<sup>56</sup> (人)+地【宮】【聖】【石】。(大正 25, 424d, n.19)

<sup>57</sup> 辦=作【聖】【石】。(大正 25, 424d, n.20)

<sup>58</sup> 至+(無)【元】【明】。(大正 25, 424d, n.22)

<sup>59</sup> (1)《大般若波羅蜜多經》卷 418〈21 無所有品〉：「善現！又如虛空非有淨觀地、種姓地、第八地、具見地、薄地、離欲地、已辦地、獨覺地、菩薩地、如來地可得；大乘亦爾，非有淨觀地乃至如來地可得，故說大乘與虛空等。」(大正 7, 97c26-29)

(2) 案：鳩摩羅什譯《摩訶般若波羅蜜經》及《大智度論》此處僅談到「三乘共十地」的前七地，但玄奘譯的《大般若經》也提到後三地。不過「初地」名稱不同，羅什譯乾慧地，玄奘譯淨觀地。

(3) 關於三乘共十地之階位，參見《大智度論》卷 75 (大正 25, 585c28-586a17)。

**(13) 無聲聞四果相**

如虛空無須陀洹果、無斯陀含果、無阿那含果、無阿羅漢果；摩訶衍亦如是，無須陀洹果乃至無<sup>60</sup>阿羅漢果。

**(14) 無三乘地相**

如虛空無聲聞地、無辟支佛地、無佛地；摩訶衍亦如是，無聲聞地乃至無佛地。以是故說摩訶衍與空等。

**(15) 非色非無色等相**

如虛空非色非無色、非可見非不可見、非有對非無對、非合非散；摩訶衍亦如是，非色非無色、非可見非不可見、非有對非無對、非合非散。以是故說摩訶衍與空等。<sup>61</sup>

**(16) 非常非無常等相**

須菩提！如虛空非常非無常、非樂非苦、非我非無我；摩訶衍亦如是，非常非無常、非樂<sup>62</sup>非(425a)苦<sup>63</sup>、非我非無我。以是故說摩訶衍與空等。

**(17) 非空非不空等相**

須菩提！如虛空非空非不空、非相非無相、非作非無作；摩訶衍亦如是，非空非不空、非相非無相、非作非無作。以是故說摩訶衍與空等。

**(18) 非滅離非不滅離相**

須菩提！如虛空非寂滅非不寂滅、非離非不離；摩訶衍亦如是，非寂滅非不寂滅、非離非不離。以是故說摩訶衍與空等。

**(19) 非闇非明相**

須菩提！如虛空非闇、非明；摩訶衍亦如是，非闇、非明。以是故說摩訶衍與空等。

**(20) 非得非不得相**

須菩提！如虛空非可得、非不可得；摩訶衍亦如是，非可得、非不可得。以是故說摩訶衍與空等。

**(21) 非可說非不可說相**

須菩提！如虛空非可說、非不可說；摩訶衍亦如是，非可說、非不可說。以是故說摩訶衍與空等。

**2、結歎**

須菩提！以是諸因緣故說摩訶衍與空等。

<sup>60</sup> [無] — 【宋】【宮】。(大正 25, 424d, n.22)

<sup>61</sup> 《大般若波羅蜜多經》卷 418 〈21 無所有品〉：「善現！又如虛空非有色非無色、非有見非無見、非有對非無對、非相應非不相應；大乘亦爾，非有色非無色、非有見非無見、非有對非無對、非相應非不相應，故說大乘與虛空等。」(大正 7, 98a10-14)

<sup>62</sup> 樂=苦【宋】【宮】。(大正 25, 424d, n.23)

<sup>63</sup> 苦=樂【宋】【宮】。(大正 25, 425d, n.1)

【論<sup>64</sup>】者言<sup>65</sup>：

（二）釋等空歎

1、如虛空無十方、長短、方圓、青黃赤白等相，摩訶衍亦如是，故說摩訶衍與空等

須菩提讚衍如虛空，佛即廣述成其事。

如虛空無十方，是摩訶衍亦無十方；無長短、方圓、青黃赤白等，是摩訶衍亦如是。

※ 釋疑：虛空是無為法，六度等摩訶衍是有為法，云何言「與虛空等」<sup>66</sup>

問曰：虛空應爾，是無為法，無色、無方；摩訶衍是有為法，是色法——所謂布施、持戒等，云何言「與虛空等」？

答曰：

（1）世間六度不同虛空，出世間六度似如虛空

六波羅蜜有二種：世間、出世間。

A、世間六度是有為、色法，不同虛空

世間者，是有為法、色法，不同虛空。

B、出世間六度與實相慧和合故，似如虛空。——得無生忍後，無所分別如虛空

出世間者，與如、法性、實際、智慧和合故，似如虛空。從得無生忍已後，無所分別，如虛空。

（2）佛以無礙智慧觀實相如虛空，餘人不然

復次，如佛以無礙智觀實相如虛空；餘人則不然，智慧未畢竟清淨故。

（3）佛說諸法畢竟空，如虛空故，不應疑

復次，佛前後說「諸法畢竟空，如無餘涅槃相，如虛空」，不應致疑。餘法亦如是。

2、如虛空非三世相乃至如虛空非可說非不可說，摩訶衍亦如是

乃至如虛空非說、非不說亦如是。

3、釋疑：言「如虛空無所有」便足，何須詳說無種種相以明摩訶衍與虛空等

問曰：如虛空，言「無所有」便足，何以說「無種種相」？

答曰：初發心菩薩（425b）於內外種種因緣法中著心，以是故，佛說如虛空無是種種相，摩訶衍亦如是。

【經】

（三）含受歎

1、佛印可須菩提所說，並總相說一切法空故能含受

（1）佛印可

<sup>64</sup>（論）+【論】【元】【明】。（大正 25，425d，n.2）

<sup>65</sup>〔者言〕—【石】。（大正 25，425d，n.3）

<sup>66</sup>┌世間檀是有為，色法不同虛空

└┌出世間檀與實相慧和合故，似如虛空。——得無生忍後，無所分別如虛空。  
六度如虛空└└佛以無礙智慧觀實相如虛空，餘人不然。

（印順法師，《大智度論筆記》〔B015〕p.139）

須菩提！如汝所言：『如虛空受無量無邊阿僧祇眾生，摩訶衍亦受無量無邊阿僧祇眾生。』

## (2) 總相說一切法空故能含受

### A、眾生、虛空、摩訶衍無所有故

如是！如是！須菩提！眾生無所有故，當知虛空無所有；虛空無所<sup>67</sup>有故，當知摩訶衍亦無所有。以是因緣故，摩訶衍受無量無邊阿僧祇眾生。

何以故？是眾生、虛空、摩訶衍——是法皆不可得故。

### B、摩訶衍、阿僧祇、無量、無邊無所有故，一切法無所有

復次，須菩提！摩訶衍無所有故，當知阿僧祇無所有；阿僧祇無所有故，當知無量無所有；無量無所有故，當知無邊無所有；無邊無所有故，當知一切諸法無所有。以是因緣故，須菩提！是摩訶衍受無量無邊阿僧祇眾生。

何以故？是眾生、虛空、摩訶衍、阿僧祇、無量、無邊——是一切法不可得故。<sup>68</sup>

## 2、別說諸法空故能含受

### (1) 如、法性、實際等皆不可得

復次，須菩提！我無所有乃至知者、見者無所有故，當知如、法性、實際無所有；如、法性、實際無所有故，當知乃至無量、無邊、阿僧祇無所有；無量、無邊、阿僧祇無所有故，當知一切法無所有。以是因緣故，須菩提！摩訶衍受無量無邊阿僧祇眾生。何以故？是眾生乃至知者、見者，實際乃至無量、無邊、阿僧祇——是一切法不可得故。<sup>69</sup>

### (2) 不可思議性、五蘊等皆不可得

復次，須菩提！我無所有乃至知者、見者無所有故，當知不可思議性無所有；不可思議性無所有故，當知色、受、想、行、識無所有；色、受、想、行、識無所有故，當知虛空無所有；虛空無所有故，當知摩訶衍無所有；摩訶衍無所有故，當知阿僧祇無所有；阿僧祇無所有故，當知無量無所有；無量無所有故，當知無邊(425c)無所有；無邊無所有故，當知一切諸法無所有。以是因緣故，須菩提！

<sup>67</sup> [所] — 【宋】【元】【明】【宮】【聖】【石】。(大正 25, 425d, n.4)

<sup>68</sup> 《大般若波羅蜜多經》卷 418〈21 無所有品〉：「復次，善現！有情無所有故，當知虛空亦無所有；虛空無所有故，當知大乘亦無所有；大乘無所有故，當知無量亦無所有；無量無所有故，當知無數亦無所有；無數無所有故，當知無邊亦無所有；無邊無所有故，當知一切法亦無所有。由此因緣，故說大乘普能容受無量無數無邊有情。何以故？善現！若有情、若虛空、若大乘、若無量、若無數、若無邊、若一切法，如是一切皆無所有不可得故。」(大正 7, 98b16-25)

<sup>69</sup> 《大般若波羅蜜多經》卷 418〈21 無所有品〉：「復次，善現！我乃至見者無所有故，當知真如、實際、不思議界、安隱界等展轉亦無所有；真如、實際、不思議界、安隱界等無所有故，當知虛空亦無所有；虛空無所有故，當知大乘亦無所有；大乘無所有故，當知無量亦無所有；無量無所有故，當知無數亦無所有；無數無所有故，當知無邊亦無所有；無邊無所有故，當知一切法亦無所有。由此因緣，故說大乘普能容受無量無數無邊有情。何以故？善現！若我乃至見者，若真如、實際、不思議界、安隱界等，若虛空、若大乘、若無量、若無數、若無邊、若一切法，如是一切皆無所有不可得故。」(大正 7, 98c25-99a8)

當知摩訶衍受無量無邊阿僧祇眾生。何以故？須菩提！我乃至知者、見者等一切法皆不可得故。

**(3) 六入等皆不可得**

復次，須菩提！我無所有乃至知者、見者無所有故，當知眼無所有，耳、鼻、舌、身、意無所有；眼乃至意無所有故，當知虛空無所有；虛空無所有故，當知摩訶衍無所有；摩訶衍無所有故，當知阿僧祇無所有；阿僧祇無所有故，當知無量無所有；無量無所有故，當知無邊無所有；無邊無所有故，當知一切諸法無所有。以是因緣故，須菩提！摩訶衍受無量無邊阿僧祇眾生。何以故？須菩提！我乃至一切諸法皆不可得故。

**(4) 六度等法皆不可得**

復次，須菩提！我無所有乃至知者、見者無所有故，當知檀波羅蜜無所有，尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜無所有；般若波羅蜜無所有故，當知虛空無所有；虛空無所有故，當知摩訶衍無所有；摩訶衍無所有故，當知無量無邊阿僧祇無所有；無量無邊阿僧祇無所有故，當知一切諸法無所有。以是因緣故，須菩提！摩訶衍受無量無邊阿僧祇眾生。何以故？我、眾生乃至一切諸法皆不可得故。

**(5) 十八空等皆不可得**

復次，須菩提！我無所有乃至知者、見者無所有故，當知內空無所有，乃至無法有法空無所有；無法有法空無所有故，當知虛空無所有；虛空無所有故，當知摩訶衍無所有；摩訶衍無所有故，當知阿僧祇、無量、無邊無所有；阿僧祇、無量、無邊無所有故，當知一切諸法無所有。以是因緣故，須(426a)菩提！摩訶衍受無量無邊阿僧祇眾生。何以故？我、眾生乃至一切諸法皆不可得故。

**(6) 四念處乃至十八不共法等皆不可得**

復次，須菩提！我、眾生乃至知者、見者無所有故，當知四念處無所有；四念處無所有故，乃至十八不共法無所有；十八不共法無所有故，當知虛空無所有；虛空無所有故，當知摩訶衍無所有；摩訶衍無所有故，當知阿僧祇、無量、無邊無所有；阿僧祇、無量、無邊無所有故，當知一切諸法無所有。以是因緣故，須菩提！是摩訶衍受無量無邊阿僧祇眾生。何以故？我、眾生乃至一切諸法皆不可得故。

**(7) 性地乃至已作地等皆不可得**

復次，須菩提！我、眾生無所有乃至知者、見者無所有故，當知性地<sup>70</sup>無所有，乃至已作地無所有；已作地無所有故，當知虛空無所有；虛空無所有故，當知摩訶衍無所有；摩訶衍無所有故，當知阿僧祇、無量、無邊無所有；阿僧祇、無量、無邊無所有故，當知一切諸法無所有。以是因緣故，是摩訶衍受無量無邊阿僧祇眾生。何以故？我、眾生乃至一切諸法皆不可得故。

<sup>70</sup> 性地=法性【聖】【石】。(大正 25, 426d, n.2)

**(8) 四果聖者等皆不可得**

復次，須菩提！我、眾生乃至知者、見者無所有故，當知須陀洹無所有；須陀洹無所有故，當知斯陀含無所有；斯陀含無所有故，當知阿那含無所有；阿那含無所有故，當知阿羅漢無所有；阿羅漢無所有故，當知乃至一切諸法無所有。以是因緣故，須菩提！摩訶衍受無量無邊阿僧祇眾生。何以故？須菩提！我乃至一切諸法皆不可得故。

**(9) 三乘乃至一切種智等皆不可得**

復次，須菩提！我乃至知者、見者無所有故，當知聲聞乘無所有；聲聞乘無所有故，當知辟支佛乘無所有；辟支佛（426b）乘無所有故，當知佛乘無所有；佛乘無所有故，當知聲聞人無所有；聲聞人無所有故，當知須陀洹無所有；須陀洹無所有故，乃至佛無所有；佛無所有故，當知一切種智無所有；一切種智無所有故，當知虛空無所有；虛空無所有故，當知摩訶衍無所有；摩訶衍無所有故，當知乃至一切諸法無所有。以是因緣故，摩訶衍受無量無邊阿僧祇眾生。何以故？我乃至一切諸法皆不可得故。

**(10) 舉涅槃為喻**

譬如，須菩提！涅槃性中受無量無邊阿僧祇眾生，是摩訶衍亦受無量無邊阿僧祇眾生。

**3、結成**

以是因緣故，須菩提！如虛空受無量無邊阿僧祇眾生，是摩訶衍亦如是受無量無邊阿僧祇眾生。

**【論】**

**(三) 釋含受歎**

**1、總相說一切法空故能含受**

**(1) 釋疑**

**A、何故不說「虛空廣大故能含受」而言「虛空無所有故能含受」**

問曰：何以不說「虛空廣大無邊故受一切物」，而言「虛空無所有故能受一切物眾生，摩訶衍亦無所有」？

答曰：現見虛空無所有，一切萬物皆在其中，以無所有故能受。<sup>71</sup>

**B、心心所法亦無形質，何以不含受一切**

問曰：心心數法亦無形質，何以不受<sup>72</sup>一切物？

答曰：

**(A) 心心所法非受相，唯以分別相故知有心；因色無說有虛空，則知虛空受物**

心心數法覺知相，非是受相，又無住處——若內、若外，若近、若遠，但以分別相故知有心。

<sup>71</sup> 「不說廣大無邊故能含受  
虛空含受一切」今說空無所有故能含受

（印順法師，《大智度論筆記》〔B016〕p.139）

<sup>72</sup> 受=愛【聖】。（大正 25，426d，n.4）

形色法有住處，因色處故，知有虛空。以色不受物故<sup>73</sup>，則知虛空受物——色與虛空相違，色若不受，則知虛空是受；如以無明故知有明，以苦故知有樂。因色無故說有虛空，更無別相。

**(B) 心心所法中性相違者互不受；虛空則一切皆受**

復次，心心數法更有不受義，如邪見心不受正見，正見心不受邪見。虛空則不然，一切皆受故。

**(C) 心心所法是有為生滅故；虛空則不然**

又心心數法生滅相，是可斷法；虛空則不然。

**(D) 結成**

心心數法、虛空，但無色、無形同，不得言都不異。以(426c)是故，諸法中說虛空能受一切。

**C、虛空無自相，待色無而假說，故言「虛空無所有而含受一切」**

問曰：我先問意不然！何以不言「虛空無量無邊能受一切物」，而言「無所有受一切物」？

答曰：我說虛空無自相，待色相說虛空；若無自相，則無虛空，云何言「無量無邊」？

**D、釋疑：受相則是虛空，云何言「無虛空」**<sup>74</sup>

問曰：汝言「受相則是虛空」，云何言「無」？

答曰：

**(A) 色不到處，假名為虛空**

受相即是無色相——色不到處，名為虛空；以是故無虛空。

**(B) 若實有虛空，未有色時或已有色皆應有虛空**

若實有<sup>75</sup>虛空，未有色時應有虛空！

**a、若未有色時已有虛空，虛空則無相**

若未有色有虛空，虛空則無相。何以故？以未有色故。因色故知有虛空，有色故便有無色。

**b、若先有色後有虛空，虛空則是作法**

若先有色後有虛空，虛空則是作法——作法不名為常。

**(C) 無相法不可得**

若有無相法，是不可得。<sup>76</sup>

<sup>73</sup> 故=性【宋】【元】【明】。(大正 25, 426d, n.5)

<sup>74</sup> (1)《中論》卷 1〈5 觀六種品〉：「空相未有時，則無虛空法；若先有虛空，即為是無相。是無相之法，一切處無有；於無相法中，相則無所相。」(大正 30, 7b5-8a6)

(2) 另參見印順法師，《中觀論頌講記》，pp.125-128；《中觀今論》，pp.126-131。

<sup>75</sup> [有]—【宋】【元】【明】【宮】。(大正 25, 426d, n.7)

<sup>76</sup> 參見《大智度論》卷 64〈43 無作實相品〉：

如虛空無所得相，不得有、不得無。若有「無相」，如先破虛空相；若無，因是虛空造無量事！般若波羅蜜亦如是，有、無相不可得故清淨。(大正 25, 514c16-20)

**(D) 結**

以是故無虛空。

**E、虛空寂滅如涅槃，不名相所相、法非法、有無**

問曰：若<sup>77</sup>常有虛空，因色故虛空相現，然後相在虛空。

答曰：若虛空先無相，後相亦無所住。

若虛空先有相，相無所相；若先無相，相亦無所住。<sup>78</sup>

若離相、無相已<sup>79</sup>，相無住處；<sup>80</sup>

若相無住處，所相處亦無；所相處無故，相亦無；<sup>81</sup>

離相及相處，更無有法。<sup>82</sup>

以是故，虛空不名為相、不名為所相，不名為法、不名為非法，不名為有、不名為無，斷諸語言，寂滅如無餘涅槃。

餘一切法亦如是。

**F、以易解空辨難解事，故以虛空為喻**

問曰：若一切法如是者，即是虛空，何以復以虛空為喻？

答曰：諸法因果皆是虛誑，因無明故有，誑眾生心；眾生於是法中生著，而不於虛空生著；六塵法誑眾生心，虛空雖復誑，則不爾！

以是故，以虛空為喻，以麤現事破微細事。

**(2) 釋經義**

**A、釋「眾生無所有故虛空無所有、摩訶衍亦無所有」**

如虛空因色故，但有假名，無有定法；眾生亦如是，因五眾和合故，但有假名，亦無定法。摩訶衍亦如是，(427a)以眾生空，無佛無菩薩；以有眾生故，有佛有菩薩；若無佛無菩薩，則無摩訶衍。以是故，摩訶衍能受無量無邊阿僧祇眾生；若是有法，不能受無量諸佛及弟子。

**B、釋「摩訶衍無所有故，阿僧祇、無量、無邊無所有，一切法亦無所有」**

**(A) 釋疑：若實無虛空，云何能受無量阿僧祇眾生**

問曰：若實無虛空，云何能受無量無邊阿僧祇眾生？

答曰：以是故，佛說：「摩訶衍無故，阿僧祇無；阿僧祇無故，無量亦無；無量無故，無邊亦無；無邊無故，一切法亦無，以是故能受。」

<sup>77</sup> [若] — 【宮】【聖】【石】。(大正 25, 426d, n.8)

<sup>78</sup> 參見《中論》卷 1〈5 觀六種品〉：「空相未有時，則無虛空法；若先有虛空，即為是無相。」(大正 30, 7b8-9)

<sup>79</sup> 已 = 以【宋】【元】【明】【宮】。(大正 25, 426d, n.10)

<sup>80</sup> 參見《中論》卷 1〈5 觀六種品〉：「有相無相中，相則無所住；離有相無相，餘處亦不住。」(大正 30, 7b22-23)

<sup>81</sup> 參見《中論》卷 1〈5 觀六種品〉：「相法無有故，可相法亦無；可相法無故，相法亦復無。」(大正 30, 7c4-5)

<sup>82</sup> 參見《中論》卷 1〈5 觀六種品〉：「是故今無相，亦無有可相；離相可相已，更亦無有物。」(大正 30, 7c9-10)

**(B) 釋「阿僧祇」(無數)**

「阿僧祇」者，「僧祇」，秦言數；「阿」，秦言無。

**a、眾生、諸法各各不可得邊故**

眾生、諸法各各不可得邊故名「無數」。

**b、數虛空十方遠近不可得邊故**

數虛空十方遠近不可得邊故名「無數」。

**c、六度等無有數，眾生不可數故**

分別數六波羅蜜——種種布施、種種持戒等無有數；數幾眾生已上乘、當上乘、今上乘不可數，是名「無數」。

**d、一一法皆是一，更無餘數故**

復次，有人言：初數為一，但有一；一一故言二，如是等皆一，更無餘數法。若皆是一，則無數。

**e、一切法和合故有，無有定實法，一法無故多亦無故**

有人言：一切法和合故有名字，如輪、輞、輻、轂和合故名為車，無有定實法。一法無故，多亦無，先一後多故。

**f、數事無故，數亦無**

復次，以繫<sup>83</sup>數事<sup>84</sup>，數事無故，數亦無。

**(C) 釋「無數故無量」、「無量故無邊」**

「無量」者，如以斗稱量物，以智慧量諸法亦如是。諸法空故無數，無數故無量無邊<sup>85</sup>，無有實智，云何能得諸法定相？

無量故無邊——「量」<sup>86</sup>名總相，「邊」名別相；「量」為初始，「邊」名終竟<sup>87</sup>。

**2、別說諸法空故能含受**

**(1) 如、法性、實際等皆不可得**

復次，我乃至知者、見者無故，實際亦無；實際無故，無數亦無；無數無故，無量亦無；無量無故，無邊亦無；無邊無故，一切法亦無。以是故，一切法無<sup>88</sup>，畢竟清淨。

是摩訶衍能含受一切眾生及法——二事相因：若無眾生則無法，若無法則無眾生。先總相說<sup>89</sup>一切法空，後一一別說諸法空。實際是(427b)末後妙法，<sup>90</sup>此若無者，何況餘法！

<sup>83</sup> 〔繫〕—【宋】【元】【明】【宮】【聖】【石】。(大正 25, 427d, n.6)

<sup>84</sup> 數事數事=數數事【元】【明】【聖】【石】。(大正 25, 427d, n.7)

<sup>85</sup> 〔無邊〕—【聖】【石】。(大正 25, 427d, n.8)

<sup>86</sup> 量=無【聖】。(大正 25, 427d, n.9)

<sup>87</sup> 竟=意【聖】。(大正 25, 427d, n.10)

<sup>88</sup> 〔無〕—【宋】【元】【明】【宮】【聖】。(大正 25, 427d, n.11)

<sup>89</sup> 〔說〕—【宋】【元】【明】【宮】【聖】【石】。(大正 25, 427d, n.12)

<sup>90</sup> 實際：末後妙法。(印順法師，《大智度論筆記》[E008] p.300)

**(2) 例餘不可思議性乃至涅槃性皆不可得**

從不可思議性乃至如涅槃性亦如是。

**【經】**

**(四) 不見來去住處歎**

**1、佛印可須菩提所說摩訶衍無來、無去、無住，並總說一切法亦無來、無去、無住**

須菩提！汝所言：『是摩訶衍不見來處、不見去處、不見住處。』

如是！如是！須菩提！是摩訶衍不見來處、不見去處、不見住處。

何以故？須菩提！一切諸法不動相故，是法無來處、無去處、無住處。<sup>91</sup>

**2、別觀諸法之五事明無來、無去、無住**

**(1) 舉五蘊說**

何以故？須菩提！色，無所從來，亦無所去，亦無所住；受、想、行、識，無所從來，亦無所去，亦無所住。<sup>92</sup>

須菩提！色法，無所從來，亦無所去，亦無所住；受、想、行、識法，無所從來，亦無所去，亦無所住。<sup>93</sup>

須菩提！色如<sup>94</sup>，無所從來，亦無所去，亦無所住；受、想、行、識如，無所從來，亦無所去，亦無所住。<sup>95</sup>

須菩提！色性，無所從來，亦無所去，亦無所住；受、想、行、識性，無所從來，亦無所去，亦無所住。<sup>96</sup>

須菩提！色相，無所從來，亦無所去，亦無所住；受、想、行、識相，無所從來，亦無所去，亦無所住。<sup>97</sup>

**(2) 舉六根、六塵、六大說**

須菩提！眼、眼法、眼如、眼性、眼相，無所從來，亦無所去，亦無所住；耳……鼻……舌……身……；意、意法、意如、意性、意相，無所從來，亦無所去，亦無所住。

<sup>91</sup> 《大般若波羅蜜多經》卷 419〈21 無所有品〉：「復次，善現！汝說『又如虛空無來無去無住可見；大乘亦爾，無來無去無住可見』者，如是！如是！如汝所說。所以者何？善現！以一切法無來無去亦復不住。何以故？善現！以一切法若動若住不可得故，由此因緣，大乘亦無來處、去處、住處可得。」(大正 7，102c25-103a1)

<sup>92</sup> 《大般若波羅蜜多經》卷 419〈21 無所有品〉：「善現！色無所從來，亦無所去，亦無所住；受、想、行、識無所從來，亦無所去，亦無所住。」(大正 7，103a2-3)

<sup>93</sup> 《大般若波羅蜜多經》卷 419〈21 無所有品〉：「善現！色本性無所從來，亦無所去，亦無所住；受、想、行、識本性無所從來，亦無所去，亦無所住。」(大正 7，103a4-6)

<sup>94</sup> [色如無所……色] 三十五字一【聖】。(大正 25，427d，n.13)

<sup>95</sup> 《大般若波羅蜜多經》卷 419〈21 無所有品〉：「善現！色真如無所從來，亦無所去，亦無所住；受、想、行、識真如無所從來，亦無所去，亦無所住。」(大正 7，103a6-8)

<sup>96</sup> 《大般若波羅蜜多經》卷 419〈21 無所有品〉：「善現！色自性無所從來，亦無所去，亦無所住；受、想、行、識、自性無所從來，亦無所去，亦無所住。」(大正 7，103a8-10)

<sup>97</sup> 《大般若波羅蜜多經》卷 419〈21 無所有品〉：「色自相無所從來，亦無所去，亦無所住；受、想、行、識自相無所從來，亦無所去，亦無所住。」(大正 7，103a10-12)

色、聲、香、味、觸、法亦如是。

須菩提！地種、地種法、地種如、地種性、地種相，無所從來，亦無所去，亦無所住；水……火……風……空……；識種、識種法、識種如、識種性、識種相亦如是。

**(3) 舉如、實際、不可思議說**

須菩提！如、如法<sup>98</sup>、如如<sup>99</sup>、如性<sup>100</sup>、如相，無所從來，亦無所去，亦無所住。

須菩提！實際、實際法、實際如、實際性、實際相，無所從來，亦無所去，亦無所住。

須菩提！不可思議、不可思議法、不可思議如、不可思議性、不可思議相，無所從來，亦無所去，亦無所住。

**(4) 舉六度、四念處乃至十八不共法說**

須菩提！檀波羅蜜、檀波(427c)羅蜜法、檀波羅蜜如、檀波羅蜜性、檀波羅蜜相，無所從來，亦無所去，亦無所住；尸羅波羅蜜……羼提波羅蜜……毘梨耶波羅蜜……禪波羅蜜……；般若波羅蜜、般若波羅蜜法、般若波羅蜜如、般若波羅蜜性、般若波羅蜜相，無所從來，亦無所去，亦無所住。

須菩提！四念處、四念處法、四念處如、四念處性、四念處相，無所從來，亦無所去，亦無所住；乃至十八不共法亦如是。

**(5) 舉菩薩、佛、無上菩提說**

須菩提！菩薩、菩薩法、菩薩如、菩薩性、菩薩相，無所從來，亦無所去，亦無所住。

佛、佛法、佛如、佛性、佛相，無所從來，亦無所去，亦無所住。

阿耨多羅三藐三菩提、阿耨多羅三藐三菩提法如性相，無所從來，亦無所去，亦無所住。<sup>101</sup>

**(6) 舉有為法、無為法說**

須菩提！有為法、有為法法、有為法如、有為法性、有為法相，無所從來，亦無所去，亦無所住。

<sup>98</sup> (無) + 法【石】。(大正 25, 427d, n.14)

<sup>99</sup> [如] - 【石】。(大正 25, 427d, n.15)

<sup>100</sup> 如性 = 性如【宋】【元】【明】【宮】，[如] - 【石】。(大正 25, 427d, n.16)

<sup>101</sup> 《大般若波羅蜜多經》卷 419〈21 無所有品〉：「復次，善現！菩提無所從來，亦無所去，亦無所住；佛陀無所從來，亦無所去，亦無所住。善現！菩提本性無所從來，亦無所去，亦無所住；佛陀本性無所從來，亦無所去，亦無所住。善現！菩提真如無所從來，亦無所去，亦無所住；佛陀真如無所從來，亦無所去，亦無所住。善現！菩提自性無所從來，亦無所去，亦無所住；佛陀自性無所從來，亦無所去，亦無所住。善現！菩提自相無所從來，亦無所去，亦無所住；佛陀自相無所從來，亦無所去，亦無所住。何以故？善現！菩提佛陀本性、真如、自性、自相若動若住不可得故。」(大正 7, 105a9-20)

須菩提！無為法<sup>102</sup>、無為法法、無為法如、無為法性、無為法相，無所從來，亦無所去，亦無所住。<sup>103</sup>

### 3、結歎

以是因緣故，須菩提！是摩訶衍不見來處、不見去處、不見住處。

【論<sup>104</sup>】者言<sup>105</sup>：

#### (四) 釋不見來去住處歎

1、佛印可須菩提所說摩訶衍無來、無去、無住，並總說一切法亦無來、無去、無住

##### (1) 佛總相說一切法亦無來、無去、無住

佛謂：「須菩提！汝何以但讚摩訶衍無來、無去、無住？一切法亦如是無來、無去、無住，一切法實相不動故。」

##### (2) 釋疑：現見諸法有來去，云何言「無來無去」

問曰：諸法現有來去可見，云何言「不動相」、「無來無去」？

答曰：

##### A、無我故，無來去者，亦無來去相

來去相先已破，<sup>106</sup>今當更說。一切佛法中，無我、無眾生，乃至無知者、見者故，來者去者無；來者去者無故，來去相亦應無。

##### B、三世中求去相不可得

復次，三世中求去相不可得。所以者何？已去中無去，未去中亦無去；離已去未去，去時亦無去。<sup>107</sup>

##### ※ 別釋「去時亦無去」

問曰：有身動處是名為去，已去、未去中無身<sup>108</sup> (428a) 動；以是故去時身動，即應有去。

答曰：不然！離去相，去時不可得；離去時，去相不可得，云何言「去時去」？

復次，若去時有去相，應離去相有去時。何以故？汝說「去時有去」故。

<sup>102</sup> [法] — 【聖】。(大正 25, 427d, n.18)

<sup>103</sup> 《大般若波羅蜜多經》卷 419 〈21 無所有品〉：「復次，善現！有為界無所從來，亦無所去，亦無所住；無為界無所從來，亦無所去，亦無所住。善現！有為界本性無所從來，亦無所去，亦無所住；無為界本性無所從來，亦無所去，亦無所住。善現！有為界真如無所從來，亦無所去，亦無所住；無為界真如無所從來，亦無所去，亦無所住。善現！有為界自性無所從來，亦無所去，亦無所住；無為界自性無所從來，亦無所去，亦無所住。善現！有為界自相無所從來，亦無所去，亦無所住；無為界自相無所從來，亦無所去，亦無所住。何以故？善現！有為界、無為界本性、真如、自性、自相若動若住不可得故。」(大正 7, 105a21-b4)

<sup>104</sup> (論) + 【論】【元】【明】。(大正 25, 427d, n.20)

<sup>105</sup> [者言] — 【石】。(大正 25, 427d, n.21)

<sup>106</sup> 《大智度論》卷 19 (大正 25, 205b21-c21)。

<sup>107</sup> (1) 《中論》卷 1 〈2 觀去來品〉：「已去無有去，未去亦無去；離已去未去，去時亦無去。」(大正 30, 3c8-9)

(2) 另參見印順法師，《中觀論頌講記》，pp.84-85，《中觀今論》，pp.132-135。

<sup>108</sup> 無身 = 身無【聖】。(大正 25, 427d, n.23)

復次，若去時去，應有二去：一者、知去時，二者、知去時去。<sup>109</sup>

問曰：若爾，有何咎？

答曰：若爾，有二去者。何以故？離去者無去相。若離去者無去相，離去相無去者。是故去者不去，不去者亦不去；離去、不去，亦無有去。<sup>110</sup>

### C、例餘來者、住者

來者、住者亦如是。

### D、結成

以是故佛說：凡夫人法虛誑無實，雖復肉眼所見，與畜生無異，是不可信。<sup>111</sup>是故說：「諸法無來、無去、無住處，亦無動。」

## 2、別觀諸法之五事明無來、無去、無住

### (1) 詳釋「色之五事」<sup>112</sup>

何者是？所謂色、色法、色如、色性、色相。

#### A、色

「色」名眼見事，未分別好醜、實不實、自相他相。

#### B、色法

「色法」名無常生滅、不淨等。

#### C、色如

「色如」名色和合有，如水沫不牢固，離散則無，虛偽無實，但誑人眼。色現在如是，過去、未來亦爾。如現在火熱，比知過去、未來亦如是。

<sup>109</sup> (1) 《中論》卷 1〈2 觀去來品〉：「動處則有去，此中有去時，非已去未去，是故去時去。云何於去時而當有去法？若離於去法，去時不可得。若言去時去，是人則有咎；離去有去時，去時獨去故。若去時有去，則有二種去：一謂為去時，二謂去時去。」（大正 30，3c13-4a14）

(2) 另參見印順法師，《中觀論頌講記》，pp.85-87。

<sup>110</sup> (1) 《中論》卷 1〈2 觀去來品〉：「若有二去法，則有二去者；以離於去者，去法不可得。若離於去者，去法不可得；以無去法故，何得有去者？去者則不去，不去者不去；離去不去者，無第三去者。」（大正 30，4a16-29）

(2) 另參見印順法師，《中觀論頌講記》，pp.79-91。

<sup>111</sup> 出處待考，但相近者參見：

(1) 《中論》卷 1〈2 觀去來品〉（青目釋）：「問曰：汝雖種種門破去、去者，住、住者，而眼見有去、住。答曰：肉眼所見不可信。若實有去、去者，為以一法成？為以二法成？二俱有過。」（大正 30，5a18-21）

(2) 《大智度論》卷 30〈1 序品〉：「若無慧眼，雖有肉眼，猶故是盲，雖云『有眼』，與畜生無異。」（大正 25，282a4-5）

<sup>112</sup> 「色——眼見色事，未別好醜虛實自相他相。

「色法——無常生滅不淨等。

色五事「色如——虛妄無實三世如是。

「色性——佛觀色相色法色如畢竟清淨，性自爾故。

「色相——此性深妙，以相可知。見無常等相，知其性爾。

（印順法師，《大智度論筆記》〔B016〕p.139）

**D、色性**

復次，如諸佛觀色相畢竟清淨空，菩薩亦應如是觀。色眼<sup>113</sup>法、色如，何因緣不如凡夫人所見？性自爾故！

**E、色相**

此性深妙，云何可知？以色相力故可知。如火以烟為相，見烟則知有火；今見眼<sup>114</sup>色無常、破壞、苦惱、麤澁相，知其性爾。

此五<sup>115</sup>法<sup>116</sup>不去、不來、不住，如先說。

**(2) 例餘**

乃至無為、無為法、如、性、相，不來、不去、不住，亦如是。

**【經】**

**(五) 三世等歎**

**1、佛印可須菩提歎三世不可得，三世等名摩訶衍**

須菩提！汝所言：『是摩訶衍，前際不可得，後際不可得，中際不可得，是衍名三世等；以<sup>117</sup>是故，說名摩訶衍。』如是！如是！須菩提！是摩訶衍，前際不可得，後際不可得，中際不可得，是衍（428b）名三世等。以是故說名摩訶衍。

**2、廣演三世等為摩訶衍**

**(1) 約法空說三世不可得**

何以故？須菩提！過去世、過去世空，未來世、未來世空，現在世、現在世空，三世等、三世等空；摩訶衍、摩訶衍空，菩薩、菩薩空。

何以故？須菩提！是空<sup>118</sup>非一、非二、非三、非四、非五、非異。

以是故說名三世等是菩薩摩訶薩摩訶衍。<sup>119</sup>

**(2) 約空無自性說相待法不可得**

是衍中，等、不等相不可得故，染、不染不可得，瞋、不瞋不可得，癡、不癡不可得，慢、不慢不可得，乃至一切善法、不善法不可得。

是衍中，常不可得，無常不可得；樂不可得，苦不可得；實不可得，空不可得；我不可得，無我不可得；欲界不可得，色界不可得，無色界不可得；度欲界不可

<sup>113</sup> 〔眼〕－【宋】【元】【明】【宮】【聖】【石】。(大正 25, 428d, n.1)

<sup>114</sup> 今見眼=見今【宋】【元】【明】【宮】【石】，=以見今【聖】。(大正 25, 428d, n.3)

<sup>115</sup> 五=三【宋】【元】【明】。(大正 25, 428d, n.4)

<sup>116</sup> 參見《正觀》(6)，p.141：「五法」指本段的色、色法、色如、色性、色相。

<sup>117</sup> 以=如【宮】。(大正 25, 428d, n.5)

<sup>118</sup> 是空=空是【聖】。(大正 25, 428d, n.6)

<sup>119</sup> 《大般若波羅蜜多經》卷 419〈21 無所有品〉：「復次，善現！汝說『又如虛空前、後、中際皆不可得；大乘亦爾，前、後、中際皆不可得；三世平等超出三世，故名大乘』者，如是！如是！如汝所說。所以者何？善現！過去世過去世空，未來世未來世空，現在世現在世空，三世平等三世平等空，超出三世超出三世空，大乘大乘空，菩薩菩薩空。何以故？善現！空無一、二、三、四、五等差別之相，是故大乘三世平等超出三世。」(大正 7, 105b6-14)

得，度色界不可得，度無色界不可得。何以故？是摩訶衍自法不可得故。<sup>120</sup>

**(3) 約空中空不可得，說三世五蘊不可得**

須菩提！過去色、過<sup>121</sup>去色空，未來現在色、未來現在色空；過去受想行識、過去受想行識空；未來現在受想行識、未來現在受想行識空。

空中過去色不可得。何以故？空中空亦不可得，何況空中過去色可<sup>122</sup>得！<sup>123</sup>

空中未來、現在色不可得。何以故？空中空亦不可得，何況空中未來、現在色可得！

空中過去受想行識不可得。何以故？空中空<sup>124</sup>亦不可得，何況空中過去受想行識可得！

空中未來、現在受想行識不可得。何以故？空中空亦不可得，何況空中未來、現在受想行識可得！

**(4) 約等中諸法不可得，等亦不可得故，說諸道法不可得**

須菩提！過去檀波羅蜜不可得，未來檀波羅蜜不可得，現在檀波羅蜜不可得，三世等中檀波羅蜜亦不可得。何以故？等中過去世不可得、未來世不可得、現在世不可得。等中等亦不可得，何況等中過去世、未來世、現在（428c）世可得！<sup>125</sup>

尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜亦如是。

復次，須菩提！過去世中四念處不可得，乃至過去世中十八不共法不可得；未來世、現在世亦如是。

復次，須菩提！三世等中四念處不可得，三世等中乃至十八不共法亦不可得。

<sup>120</sup> 《大般若波羅蜜多經》卷 419〈21 無所有品〉：「欲界、出欲界相俱不可得，色界、出色界相俱不可得，無色界、出無色界相俱不可得。何以故？善現！此大乘中諸法自性不可得故。」（大正 7，105b19-22）

<sup>121</sup> 〔過〕－【聖】。（大正 25，428d，n.8）

<sup>122</sup> （不）＋可【宋】【元】【明】【宮】。（大正 25，428d，n.10）

<sup>123</sup> 《大般若波羅蜜多經》卷 419〈21 無所有品〉：「復次，善現！過去色、過去色空，未來現在色、未來現在色空；過去受想行識、過去受想行識空，未來現在受想行識、未來現在受想行識空。善現！空中過去色不可得。何以故？過去色即是空，空性亦空，空中空尚不可得，何況空中有過去色可得！」（大正 7，105b23-28）

<sup>124</sup> 〔空〕－【聖】。（大正 25，428d，n.12）

<sup>125</sup> （1）《大般若波羅蜜多經》卷 420〈21 無所有品〉：「復次，善現！過去布施波羅蜜多、過去布施波羅蜜多空，未來現在布施波羅蜜多、未來現在布施波羅蜜多空。……善現！空中過去布施波羅蜜多不可得。何以故？過去布施波羅蜜多即是空，空性亦空，空中空尚不可得，何況空中有過去布施波羅蜜多可得！善現！空中未來現在布施波羅蜜多不可得。何以故？未來現在布施波羅蜜多即是空，空性亦空，空中空尚不可得，何況空中有未來現在布施波羅蜜多可得！」（大正 7，107a23-b7）

（2）《大般若波羅蜜多經》卷 420〈21 無所有品〉：「復次，善現！前際布施波羅蜜多不可得，後際中際布施波羅蜜多不可得，三際平等中布施波羅蜜多亦不可得。所以者何？善現！平等中前後中際布施波羅蜜多皆不可得。何以故？平等中平等性尚不可得，何況平等中有前後中際布施波羅蜜多可得！」（大正 7，109a17-22）

何以故？等中過去世四念處不可得，等中未來世四念處不可得，等中現在世四念處不可得。等中等亦不可得，何況等中過去世四念處、未來現在世四念處可得！等中等亦不可得，何況等中過去乃至十八不共法可得！未來、現在世亦如是。

**(5) 約眾生空故凡聖不可得**

復次，須菩提！過去世中凡夫人不可得，未來世現在世中凡夫人不可得，三世等中凡夫人亦不可得。何以故？眾生不可得，乃至知者、見者不可得故。

過去世中聲聞、辟支佛、菩薩、佛不可得，未來現在世中聲聞、辟支佛、菩薩、佛不可得，三世等中聲聞、辟支佛、菩薩、佛不可得。何以故？眾生不可得，乃至知者、見者不可得故。

**3、結勸，顯勝**

如是，須菩提！菩薩摩訶薩住般若波羅蜜中，學三世等相，當具足一切種智，是名菩薩摩訶薩摩訶衍，所謂三世等相。

菩薩摩訶薩住是衍<sup>126</sup>中，**勝出**<sup>127</sup>一切世間及諸天、人、阿修羅，成就薩婆若。」<sup>128</sup>

**(伍) 舉出生三世諸佛歎摩訶衍**

**一、須菩提歎：三世菩薩學摩訶衍，得一切種智**

爾時，須菩提白佛言：「世尊！善哉！善哉！是菩薩摩訶薩摩訶衍！何以故？過去諸菩薩是衍中學得一切種智，未來世<sup>129</sup>諸菩薩摩訶薩亦是衍中學當得一切種智，世尊！今十方無量阿僧祇世界中諸菩薩摩訶薩亦是衍中學得一切種智。以是故，世尊！是衍實是菩薩摩訶薩摩訶衍。」

**二、如來述歎**

佛告須菩提：「如(429a)是！如是！過去、未來、現在諸佛，是摩訶衍中學，已得一切種智，當得、今得。」

**【論】**<sup>130</sup>者言

**(五) 釋三世等歎**

**1、佛印可須菩提歎三世不可得，三世等名摩訶衍**

須菩提略讚說：「是摩訶衍，前際、後際、中際俱不可得，三世等故，名摩訶衍。」

**2、廣演三世等為摩訶衍**

今佛廣演須菩提所讚。

<sup>126</sup> [衍] - 【聖】【石】。(大正 25, 428d, n.16)

<sup>127</sup> [出] - 【宮】【聖】【石】。(大正 25, 428d, n.17)

<sup>128</sup> 《大般若波羅蜜多經》卷 420 <21 無所有品>：「如是，善現！諸菩薩摩訶薩修行般若波羅蜜多時，住此三際平等性中，精勤修學一切相智，無取著故速得圓滿。善現！是名菩薩摩訶薩三際平等大乘。若菩薩摩訶薩住如是大乘中，超勝一切世間天、人、阿素洛等，疾能證得一切相智，利益安樂一切有情。」(大正 7, 109c10-16)

<sup>129</sup> [世] - 【明】。(大正 25, 428d, n.18)

<sup>130</sup> 【論】+ (論)【元】【明】。(大正 25, 429d, n.1)

**〔1〕約法空說三世不可得**

是三世云何不可得？所謂過去世、過去世空，未來世、未來世空，現在世、現在世空，故不可得。三世等，等者空；摩訶衍、摩訶衍自空；菩薩、菩薩自空。是三世中三世相空<sup>131</sup>。空義，如先說。<sup>132</sup>

此中佛自說空因緣，所謂：「空、空相，非一、非二、非三、非四、非五等，不異、不合、不散，無有分別。」是故三世等空相無所有故，是等亦空。

菩薩能如是解諸法三世等，不以無始世來為疲厭，不以未來世無邊故為難，是為菩薩三世等名摩訶衍。

**〔2〕約空無自性說相待法不可得**

是摩訶衍中，等相不可得，不等相亦不可得。

得是三世等三昧，破是不等相。

不等相待<sup>133</sup>故有等，不等畢竟無故等亦無。

欲、不欲，乃至三界、度三界，是相待法亦如是。

此中佛自說：「是諸法皆從因緣和合故無自性，自性無故空。」

**〔3〕約空中空相不可得，說三世五蘊相亦不可得**

復次，過去世、過去世相空，未來、現在亦如是；如色，餘四眾亦如是。

所以者何？空中空相不可得，何況空中有三世五眾相！

**〔4〕約等中諸法不可得，等亦不可得故，說諸道法不可得**

菩薩觀五眾空，斷貪欲，入道行，所謂檀波羅蜜等，亦如是<sup>134</sup>五眾三世中不可得。三世等故，等即是空，是等中檀波羅蜜不可得。

**※ 何故三世及三世等中檀波羅蜜不可得**

問曰：何以故三世及三世等中檀波羅蜜不可得？

答曰：諸法等中無三世，等等<sup>135</sup>中等相亦不可得，何況三世！

六波羅蜜乃至十八不共法亦如是。

**〔5〕約眾生空故凡聖不可得**

復次，三世中，凡夫相<sup>136</sup>不可（429b）得，聲聞乃至佛亦不可得，以眾生空故。

**3、結勸，顯勝**

菩薩住般若波羅蜜，能如是學三世等空，集諸善功德，便具足一切種智。

<sup>131</sup> 〔空〕－【宋】【元】【明】【宮】【聖】【石】。（大正 25，429d，n.4）

<sup>132</sup> 參見《正觀》(6)，p.140：《大智度論》卷 1（大正 25，65b5-66a17）、卷 32（大正 25，298b13-16）、卷 33（大正 25，302c27-303a7）、卷 36（大正 25，329a15-b26）〔《摩訶般若波羅蜜經》經文與《大智度論》的解說〕。

<sup>133</sup> 待＝持【聖】。（大正 25，429d，n.6）

<sup>134</sup> 〔是〕－【宋】【元】【明】【宮】【聖】【石】。（大正 25，429d，n.24）

<sup>135</sup> 〔等〕－【宮】【聖】【石】。（大正 25，429d，n.9）

<sup>136</sup> 相＝人【宮】。（大正 25，429d，n.11）

佛說：「菩薩能如是三世等中住，則能勝出一切世間及諸天、人、阿修羅。」

**（伍）舉出生三世諸佛歎摩訶衍**

**一、須菩提歎：三世菩薩學摩訶衍，得一切種智**

**（一）略述**

是時，須菩提讚言：「世尊！善哉！善哉！是摩訶衍利益諸菩薩。所以者何？過去諸菩薩學是摩訶衍，得一切種智；未得、今得亦如是。」

**（二）詳辨讚歎之因緣**

**1、不讚歎非因緣、少因緣**

有人言：得清淨無因緣，染垢穢亦無因緣，大小、好醜、縛解皆無主所與。

有人言：好醜、縛解，至時節自得。

有人言：福德成就故得佛道。

有人言：但得清淨實智慧得佛道。

如是等說，皆是非因緣、少因緣，須菩提所不讚歎。

**2、讚歎具足因緣**

今佛捨非因緣，亦捨不具足因緣，說是<sup>137</sup>具足因緣，所謂六波羅蜜，三世菩薩學是乘具足，得成佛道。

**二、如來述歎**

佛亦可須菩提所歎，言：「如是！如是！」

<sup>137</sup> 〔說〕－【石】。（大正 25，429d，n.13）